

D'ann Otrou Raoult, ha d'holl veleien Plougerneve.

GWERZ

ZAVET DI-WAR-BENN MARO ANN OTROU GRAËT

War don Baron Jaouioz (Barzaz-Breiz)

Son, ma zélen, son hirvouduz,
 Son, ma savinn eur werz kanvuz,
 Eur werz hag a vo klevet pell,
 Dreist ménéou Kerne-Huel.

Ar potr derved 'vid ar heure
 A gan abred oar ar mené :
 Hen zo laouen, me na n'onn ket ;
 Ma c'halon baour a zo nec'het.

Ma c'halon baour zo glac'haret,
 Marv eo ziuaz ann Otrou Graët !
 Ann Otrou Graët, hon mestr, hon zad,
 A oa d'imp ha d'ann oll ken mad.

Leret d'in-me, c'houi peorien gez,
 A vev gand poan ha dienez ;
 Piou a re d'hech labour d'ann han,
 Ha bara goude pâd ar goan ?

Ha c'houi, tud jentil di-war-dro,
Pa skoe 'n ho touez ar maro ;
Leret piou a vize klevet
O veuli ar re 'poa kollet ?

Piou a vize er misionou
Hag a re ken kaer zarmoniou ?
Hag er pardon, enn pep parroz,
Oc'h ober enor d'hon zent koz ?

Oll a-unan, e lavaret :
« Hen-nez a oa ann Otrou Graët ;
» Ann Otrou Graët, eur gwir vreizad,
» Hen-nez a oa eur belek mad. »

Mar oa den a zoujans Doue,
Den a skiant a oa ive ;
Nag a vugel en deuz desket !
Nag a velek en deuz zavet !

'Touez ménéou Kerne-Huel,
Hag he hanvet Kein-Breiz-Izel ;
Rez ann argoat, kreiz lanneier
Eunn ti kaer ha braz a gaver.

A benn da benn eo bet zavet
Gand Doue hag ann aotrou Graët ;
Doue stoke er c'halonou,
Ann Otrou Graët stoke 'n noriou.

A stoke 'n noriou, 'n eur c'houlenn
Evel ar paour ann aluzen,
Ann aluzen a c'houlene
'Vid siminer Plougerneve.

Baleour mad, te a ia pell,
Dre 'r pevar c'horn a Vreiz-Izel,
Hag enn Léon, hag enn Treger,
Ha te velaz eunn ti ken kaër ?

Eunn ti a zo digor d'ann oll,
D'ann neb a gar donet d'ar skol.
Ti biniget, pa ho kwélan,
Ma daoulagad 'deu da oelan.

Goelet ive, Kernevadiz,
Ha tud jentil, ha plouisiz ;
C'houi, dreist ar re all, beleien,
Ha c'houi, tadou, mammou kristen.

Oll oc'h euz kollet eur mignon
Hag ho kare a vir galon ;
Ni, bugale baour, emzivad,
Hon euz ziuoz ! kollet hon zad !

— Pa iud ann avel, toul ma dor,
Me glev o tonet gand ar mor,
O tonet a bell eur glemvan,
Traonienou Breiz ouz he diskan.

Pell diouz ar vro gaër a garent,
Diouz ho zad, ho mamm, ho c'herent,
E zo ive gwir vugale
Da Vreiz ha da Blougerneve.

Gwir Vretoned, tud a galon,
Et da gas pell ar fé virion ;
Evel-d-omp, 'dal m'ho deuz klevet,
Goela ha pedi ho deuz gret.

Ho fedennou, koulz hag hon re,
A zo bet deut mad gand Doue ;
Hon zad, enn envou kurunet,
Gand zent hon bro zo azeet.

Enn env, pell diouz ar bed poaniuz,
Da virviken e ma evruz ;
He zorn us da Blougerneve,
O venniga he vugale. —

— Tad ker, kenavo 'ta 'n envou !
Keit a vevimp, raimp ho kanvou !
Liez ho skeuden venniget
A dremeno dre hon spred.

Liez ive, war ho pez men,
Ni iel da laret hon feden ;
War ho pez ni iel da bedi,
Ha da laret ho meuleudi.

Ia, ken a zeui pred ar maro,
Da beb-unan, ni lavaro :
« Ra vo karet, ra vo-meulet,
» Meulet dre-oll, ann Otrou Graët. »

Pa vezo kousket 'barz ar be,
Ar re zo bet ho pugale,
Vo klevet c'hoaz, gand ann avel,
Ho meuleudi enn Breiz-Izel !

Benniget a vo hoc'h hano,
Ha karet dre-oll barz er vro,
Tra vo n'ho zao enn bro Kerne,
Ménéou du ha bruk war-n-he !

UNAN A SKOLERIEN PLOUGERNEVE.